



INTRODUCZIUN

DA FLURINA CAVEGN-TOMASCHETT

Igl evangeli per la fiasta da Numnasontga cuntegn las schinumnadas nov beadientschas che Jesus drezza enviars sias giuvnals e ses giuvnals. Cheu setracta ei da certas pretensiuns pil reginavel da Diu, denton ein ellas buca formuladas sco duers ni sco admoniziuns, mobein sco gratulaziuns. «Beai quels...» vul dir ton sco «Gratulaziun a quels...» Il gest cumportament sin tiara resp. ils deficits terresters vegnan remunerai in di en tschiel. Igl ei in text che radiescha gronda consolaziun e speranza, gest per quels che stattan sin la vart umbrivauna dalla veta. Ils plaids da Jesus empermettan che la munconza da quei mund daventa abundonza en l'outer mund.

Per drizzar quels plaids al pievel va Jesus sin in cuolm. Cheu semuossa inaga dapli ch'ils cuolms ein loghens nua che carstgauns sentan ina vischinonza speciala al tschiel – ed a Diu. Ils plaids che Jesus drezza cheu als carstgauns valan sco siu grond program. Quels plaids ein era vegni pri a cor da biaras dunnas ed umens ch'ei in i sco sontgas e sogns en la tradiziun dalla baselgia. Dad els vegn commemorau oz, il di da Numnasontga. Ad els astga vegnir gratulau per lur via tras la veta terrestre.

EVANGELI

Mt 5,1–12a

¹Vesend Jesus las roschas, eis el ius sil cuolm. El ei sesius, e ses giuvnals ein vegni neu tier el. ²Cheu ha el aviert sia bucca ed instruiu els schend: ³Beai ils paupers el spért, pertgei a quels auda il reginavel da tschiel. ⁴Beai ils cuntristai, pertgei els vegnan a vegnir consolai. ⁵Beai ils migeivels, pertgei els vegnan ad artar la tiara. ⁶Beai quels che han fom e seit per la justia, pertgei els vegnan a vegnir saziai. ⁷Beai ils misericordeivels, pertgei els vegnan a retscheiver misericordia. ⁸Beai quels d'in schuber cor, pertgei els vegnan a veser Diu. ⁹Beai quels che lavuran per la pasch, pertgei els vegnan a vegnir numnai affons da Diu. ¹⁰Beai quels che vegnan persecutai per amur dalla justia, pertgei ad els auda il reginavel da tschiel. ¹¹Beai essas vus, sch'ins smaletescha e persequitescha vus e di da vus faulsamein da tut mal per amur da mei. ¹²Selegrei e giubilei, pertgei vossa pagaglia ei gronda en tschiel.